



## Daandii Jijiramaa-kutaa 3ffaa

### Description

Daandii jijiramaa itti fufuun har'as imala keenya karaa sirri qabanne deemna.

**1. Olguddisii yaadi**— Amala ilma namaa horii irraa isa adda godhu keessaa tokko ol guddisee yaadudha. Rabbiin dandeette ilmi namaa yaade dhugaa fi dhara addaan baasu itti kenne jira. Sammuu isaatti fayyadamuu fi dhiisun mirga isaati. Namoonni ol guddisanii yaadanii fi galma guddaa gahuuf carraaqan Rabbiin bakka san isaan dhaaba. Kan sammuu ofiti osoo hin fayyadamiin yeroo hundaa gara gadii yaadu immoo achumatti hafa. Namoonni addunyaa tanatti wanta guddaa hojjatanii aakiratti mindaa guddaa argatuuf carraaqan seenan haa lakkaa'u. Yaanni isaani yeroo hundaa gara gadiiti mitii gara ooliti. “Akkamitti nama guddaa akkasii ta'a” jedhanii yaadu fi dharra'uudha. Ashaaraa akkamii dhiise addunyaa tarraaraa darbuun qaba jedhanii of gaafatu. Hojii akkamitiin Rabbii kiyya qunnama? Jedhanii dhifhatu. “Qabeenyan yoo namoota waliin of bira qabdu,namoota sii gadii hiyyeeyyi ta'an ilaali Rabbii galata galchii,wanta qabdutti gammadi,quufi. Yommuu Taqwaa(sodaa Rabbii),beekumsaa fi gaarummaan namoota waliin dorgomtu namoota taqwaan,beekumsaa fi gaarummaan si caalaan ilaali akka isaani ta'uuf hawwi,carraaqi.”

*“Osso gabayaan jiruu fi dandeetti waa bitachuu qabduu, mataa keeti bitadhu (hojii gaggaarii hojjachuun).” Imaam Ibn Al-Qayyiim*

Taqwaan,beekumsi fi gaarummaan gingilchaa namoota addaan baasaniidha. Namni qabeenya hanga fedhe qabaate yoo taqwaa,beekumsa fi gaarummaa hin qabaatin dhukkuba dhifinnaa fi gadadoo malee wanta biraan isaa hin buustu.

Namoota si oolii seenaa isaanii qo'achuu fi qorachuun akka isaani ta'uuf hawwi. Hawwuun qofti akka isaani si godhuti akka isaan carraaqanitti atillee carraaqi. Akkuma olguddiste yaaddu fi abdiin kee cimaa adeemun jireenyi dukkanoftun siif ifaa adeemti. “InshaAllah namaakkanaa ta'uun qaba” jette akkuma yaaddu fi hojii namticha sanii ilaala adeemtu afuurri dandeetti waa hojjatuu danda'uu fi galma guddaa gahuu si keessatti uumama adeema. “Aboo ani namaakkanaa ta'uun barbaada.” jechaa carraaqi gochuu jalqabda. Seenaa namticha kana qofaa miti namoota duraan gadhee turanii fi ergasii taqwaa,beekumsaa

fi gaarummaan of faayanii qo'atta. Sana booda "edaa anis namaakkana ta'uu nan danda'a, maaltu na dhowwa?" jette yaadu fi hawwuu jalqabda.

Abdii fi hawwii kee kan dukkaneessan yaadota negaativii keessaa fi alaa ofirraa ittisii. Keessi kee "hin dandeessu, ni kufta, wanta/humnaakkana hin qabdu, fi kkf" siin jedha. Keessi kee cubbuu fi hanqinna kee si yaadachisuun akka gara olii hin yaadne si hin godhin. Cubbuu kee tobwaan(gara Rabbii deebi'uun) ofirraa dhiqii irraanfadhu. Hanqinna kee immoo suuta suutan sirreessu akka dandeessu abdadhu. Yeroon ati nama gaarii itti taatu dhihoo akka ta'ee hin irraanfatin. Kanaafu cubbuu fi hir'inna kee yaadachuun fixe milkaa'innaa irraa duubatti of hin harkiisin. Hanga feete cubbamaa fi nama gadhee yoo taate abdii nama gaarii ta'u ofirratti hin dukkaneessin. Soda Rabbii fi gaarummaa horachuuf guyyaa guyyaan carraaqi godhi.

*"Bakka jirtutti wanta qabduun wanta dandeessu hojjadhu."* -Roosvelt

Kan alaa immoo namoota gara gadii malee gara olii hin yaannetu si summeessa. "Aboo gootni keenya ambaa namaakkanaa ta'uuf carraaqa, ofuu hin jijjiree nama jijjirtaa, fi yaadota kana fi kan kana fakkaataniin si laamshessu, dandeetti kee baqsu. Namootaakkanaa gurra itti hin kenniin. Sammuun kee qaliidha bakka jechoota isaanii itti kuufatu hin qabu. Yaada fi jechoota isaani dagadhu. Isaan irraayis fagaadhu. Guyyaa tokko wanti isaan yaadanii fi jedhan soba akka ta'e itti agarsiista. Ol guddistee yaadun kee fi nama gaarii ta'uuf carraaqun kaayyoo kee ol'aanaa san galmaan gahuuf si gargaara.

**2.Ijjanno-** Erga olguddistee yaadde booda kaayyoo keetirratti ijjanoo fi muranno barbaachisa. Wanta qabaterraan hanga dhumaatti irraa deebi'uu akka hin qabne gatii fi wareegama kafalamuu qabu akka kafaltu of amansiista.

*"Garaagarummaan namoota suuraa isaani caalaa ijjanoo isaani irratti kan hundaa'edha."* jedhu imam Ibn-Al-Qayyiim

Itti fufinsa kaayyoo keetitiif dhaabni kee siritti jabaachu qaba. Ajaja Rabbii hordofuu fi wantoota Inni idhowwii irraa of ittisuuf ijjanoo fi muranno cima barbaachisa. Hojii tokko yeroo jalqabnu garmalee mirqaanne jalqabuu dandeenya. Haa ta'uu malee akkuma yeroon darba adeemun fedhiin keenyas kan duraa caalaa hir'ataa adeema. Dhumarratti dhaabutu dhufa. Akkaakkana hin taanef ijjanoo ofii cimsuun baay'ee barbaachisadha.

Karaa adda addaatijjanno keenya cimsuu dandeenya. Karaan nuti ijjanoo keenya ittiin ciimsiuun inni guddaan beekumsa. Qur'aana hiika isaa waliin dubbisuu fi qo'aachun ijjanoo baquuf adeemu jabeessa, afuura kakaasa. Seenaa namoota darbanii dhageefachuu fi dubbisuu ijjanoo keenya daran cimsa. Wanta irraanfatamuun hin qabne ijjanoo fi niyyaan keenya jalqaba irratti hanga fedhe haa laafu, yoo hojii keenya hojjachuu itti fuufne ijjanoo fi Niyyaan keenya ni cima.

*"Yeroo dheeraf humna kan hin qabne turte. Kanaafu niyyaan kee siritti yoo qajeele ifni ijjanoo keeti ol faagate sitti mul'ata"* jedhu imam Ibn-Al-Qayyiim

**3.Yeroo keetti sirnaan fayyadamii-** Yeroon kee jirenyaa keeti. Galma gahuun kaayyoo keeti yeroo kee irratti hundaa'a. Yeroon takka si dabarte gonkumaa duubatti hin deebitu. Osso duuti sitti hin dhufin

wanta bitachuu dandeessu har'a bitadhu,karaa dheeraa saniif galaa qopheefadhu. Akkuma Imam Ibn Al-Qayyiim jedhan:

"Har'a milkaa'inna bitadhu osoo gabayaan jirtu,gatiin kafalamuu fi meeshaa rakasaa osoo ta'ee jiru. Hanga gabaaya fi meeshaan argamuu hin dandeetti hin eegin" Kana jechuun dhukkubni,jaarsummaan,duuti osoo sitti hin dhufiin yeroo kee hojii gaggaari hojjachuun saamadhu. Guyyaan Qiyaama guyyaa hojii gaarii itti hojjatanii of baraaranii miti. Har'a yeroon wanta hojjatachuu dandeessu hojjadhu osoo Qiyaaman sitti hin dhufin. Guyyaa Qiyaama meeshaa bitattus,gatii kafaltus hin qabdu. Har'a yeroo kee saamadhu,bakkuma argitetti hin guubin.Qaruute ta'ii.

Dhugumatti addunyaa lamaani hojjatachuun yeroon keenya nu geessi. Yeroon akkanumaan interneeti,haasawa faaydaa hin qabne fi kkf irratti dabartu madaalle beeknaa? Akkuma xiyyii sa'aati naannoftuun duuti nutti dhihaata akka jirtu,faayilin hojii keenya cufamuuf deemaa akka jiru yaanne beeknaa? Maarre faayili keenya hojii badaa irraa haaqne dalagaa gaggaarii irratti barreessuf har'a yerootti sirnaan yoo fayyadamneedha.

Yeroo keenya qoqqoonne fi saganteessinee fayyadamuu galma guddaa gahuu ni dandeenya. Guyyaa guyyaan maal hojjachuu akka qabnu barreessu fi saganteessudha. Yeroon hin sagantefamne yeroo barakaa hin qabnedha. Osoo homaa hin dalagin bakkuma argiteetti gubatti.

**4.Rabbitti hirkachuu fi Du'aayi**— Ilmi nama dhugumatti dadhabaadha(da'iifa). Dandeetti isaa qofaan wanta hamaa tokko ofirraa deebisuu hin danda'u wanta gaariis hojjachuu hin danda'u. Gargarsa isa barbaachisa. Maddi gargaarsa irraa argatuus murteessadha. Aakiraan duniyatti galma guddaa gahuu yoo barbaadde nama gargaaru kan hin hifanne Rabbii kee gaafadhu. Ilma namaa gargaarsaf yoo gaafatte si hifata,ijaan si arguu hin barbaadu. Garuu Rabbiin gargaarsaf nama isa kadhatu ni jaallata. Nama isa hin kadhanne ni jibba.

Daandiin ani irra adeemu dheeradha jette duubatti akka hin deebine abdii daandii san caalaarra dheeratu qabaatu qabda. Abdiin kee Rabbiratti hirkachuudha. Yoo sirritti fi karaa sirriitin carraaqxe daandiin hanga fedhe haa dheeratu galma san gahuu akka dandeessu amanamummaa fi abdii kee guutuu Rabbirra kaa'udha. Yeroo hundaa milkiin Rabbiraa akka ta'e beeku qabda. Milkaa'inna argatteef of aja'ibsiifachuu hin qabdu. Kana irra Rabbii galata yoo galchitee milkii san caaltu Rabbiin sii kenna.

"Guyyaan ati wanta addaa tokkoo galmaan gahee jette dhaadattu guyyaa afuurri keeti du'eedha. Kanaafu carraaqin kee guutuu of gadi qabuun(kasoon) kan guuttamee ta'uun itti fufuu qaba. Yeroo hundaa wanti ati galmaan geesse humna keetin osoo hin ta'in qananii Rabbiin sirratti oole ta'uu isaa yaadadhu;(Rabbii si milkeesse malee humna keetin akka hin taane beeki.)" -Murad Khuram

Humna kootin galma guddaa galmaan gahe jira yeroo jette yaaddu gara fuunduratti akka hin tarkaanfanne gufuu sitti ta'a. ammas milkaa'inna dabalataa kan duraa caalu argatuuf humna qabduun carraaqu fi Rabbitti hirkachuu qabda.

Daandiin jijirama ati irra deemtu daandii qoree fi mucucaati. Kanaafu akka küfte achitti hin hafne yeroo hundaa Rabbiitti iyyatuu qabda. Sheyxanni ij�انو kee laamshesse akka si hin kuffisne “Yaa Rabbii badii sheyxaanatirraa na tiksii” jette Rabbiitti iyyatu qabda.

Wanti na dinqisiisus namoonni salaata erga salaatanii booda zikriis du'aayis osoo hin godhatiin olka'anii fiigu. Akkamitti Rabbirraa fiignaa osoo harka jala hin qabatiin hiyyeyi waa hin qabne fi cuubbuu meeqa keessa borcamne osoo jirru? Dandeetti keenya qofaan wanta tokko hojjachuu kan hin dandeenyeye taane osoo jirru akkamitti olkaane Rabbirraa dheessinaa?

Na kadhaa isiniifan awwaadhaa. Dhugumatti warroonni ana gabbaruu irraa boonan salphattoota ta'anii Jahaannam seenuf jiru.” Al-Gaafir 40:60

**وَقَالَ رَبُّكُمْ أَدْعُونِي أَسْتَحِبُّ لِكُمْ إِنَّ الَّذِينَ يَسْتَكْبِرُونَ عَنْ عِبَادَتِي سَيِّدُ الْخُلُونَ جَهَنَّمَ دَاخِرِينَ**

“Gooftan keessan ni

jedhe “Na kadhaa isiniifan awwaadhaa. Dhugumatti warroonni ana gabbaruu irraa boonan salphattoota ta'anii Jahaannam seenuf jiru.” Al-Gaafir 40:60

Daandii qajeelaa qabanne irraa akka hin dabne,taqwaa,beekumsii fi gaarummaan keenya akka nu dabaluu du'aayin(Rabbiin kadhachuun) irraanfatamuu wanta hin qabneedha. Rabbitti hirkachuu fi du'aayin furtuu milkaa' innaati. Namni gargaarsa fi eeggumsa Rabbii halkanii guyyaa kadhatushha akkamitti kufaa?

Du'aayin teenya fudhatama akka qabdu yoo barbaanne hidda onne jalaati kadhachuun fi deebii Rabbirraa hanga argannuu obsuudha. Rabbiin inuman kadhaa deebii hin arganne jechuu hin qabnu. Wanta Rabbiin kadhannu argachuu akka dandeenyu abdataa kadhachuun qabnaa malee shakkaa hin argadhu jenne kadhachuun hin qabnu. Wanti kadhannu afaanirraa osoo hin ta'iin “Yaa Rabbii...” jenne hidda onnee jalaa kadhachuun qabna. InshaAllah yeroo san du'aayin teenya deebii argatti.

Du'aayiwan babareedo fiixe milkaa' innaati ol nu fuudhan keessaa muraasa mee haa eerru:

**“Gooftaa keenya duniyatti tolту,Aakhirattis tolту nuuf kenni. Adaba ibiddaa irraa nu baraari.”**  
Suuraa Al-Baqaraa 2:201

**“Gooftaa keenya erga nu qajeelchitee booda onnee keenya dhugaa irraa hin jallis. Si biraas rahmata nuuf kenni.Dhugumatti Ati akkaan kennaadha.”** Suuraa Ali-Imraan 3:8

**“...Gooftaa keenya badii keenya nuuf araarami;hamtuuwan keenyas nurraa harcaasi;warra qulqulluu wajjiinis nu ajjeessi.”** Suuraa Ali-Imraan 3:193

**“Gooftaa keenya waan ergamtoota Kee irratti waadaa nuuf seente nuuf kenni. Guyyaa Qiyaamas nu hin salphisin. Dhugumatti Ati waadaa hin faallesitu.”** Suuraa Ali-Imraan 3:194

**“...Gooftaa keenya obsa narratti dhangalaasi. Musliimoota godhii nu ajjeesi.”** Suuraa Al-A'raf

7:126

????????????? ??????????? ??????? ?????? ?????? ??????

**“Yaa Kan qalpii Jijjirtuu hoo! qalpii koo Diinii(amantii) kee irratti gadi dhaabi.”** Jami` at-Tirmizi 3587

**5.Sabrii-**Carraaqiin atii guyyaa guyyaan kaayyoo kee guddaa galmaan gahuuf gootu keessatti gufun adda addaa si dhaha. Daandii jijjiramaa irra yommuu adeemtu hadhaa sabrii liqimsuuf qophii ta’ii. Hadhaan kunii guyyaa tokko gara mi’aa fi gammachuutti jijjiramuu akka danda’uu abdataa daandii milkaa’innaa irra adeemi.

Namoonni obsuu dhabuu isaani irraa kan ka’ e waan baay’ee dhabu. Wanta san argachuuf garmalee jarjaru. Wanti jarjaraan argame immoo turtii hin qabu. Har’ a kaayyoo tokko kaayyefatanii xiqqoo erga carraaqanii booda firii isaa yeroma san arguu barbaadu. Kuni gonkumaa wanta hin taane. Wanti carraaqi fi hadhaa sabriit in argamee firiin isaa ni mii’aya. Firiin/bu’aan namoota siritti carraaqanii fi hadhaa sabrii liqimsani Jannataa miti ree? Firiin kanarra mi’awaa eessatti argama ree? Kanaafu carraaqin nuti daandii jijjiramaa irratti goonu sabriin kan guuttamee ta’uu qaba.

Rabbiin namoota sabriin karaa Isaa irratti carraaqan akka qajeelchu waadaa galee jira. Rabbiin waadaa ofii gonkumaa hin diigu; nutu ulaagalee nurraa eeggamuun guutuu dhabee malee.

 وَالَّذِينَ جَهَدُوا فِي نَاهِيَةِ نَهْرٍ سَبَلَنَا وَإِنَّ اللَّهَ لَمَعَ الْمُحْسِنِينَ

**”Warroota Nuuf qabsaa’an- dhugumatti karaa Keenyatti ni qajeelchina. Dhugumatti Rabbiin warroota hojiwwan gaggaarii hojjatan waliin jira.”** Suraa Al-Ankabut 29:69

**6.Cubbuu irraa fagaachuu fi hojii gaggaari hojjachuu-** wanta ilma namaa duubatti harkisuu cubbudha. Kan gara fuundarratti oofu immoo dalagaan gaggaariidha. Kaayyoo kee galmaan gahuuf guyyaa guyyaan wanta dandeessu dalagi. *Carraaqin guyyoota baay’ee yoo walitti kuufame gamoo milkaa’innaa ijaaru.* Akkuma wanta xixiqoo hojjattuun walitti kuufamte wanta guddaa si taati. “Damla damla göl olur.” Jedhu Turkoonni. Hiikni isaa “Bishaan cophe cophee haroo ta’ a.” Hojiin xixiqoon ati har’ a facaastu walitti kuufamte boru sii guddati. Hojii kamiyyuu xiqqaa jette hin tufatin. Xiqqueenyi sanyii guddinaati jedhama. Kana jechuun wanti hunduu xiqqaa irraa ka’ a.

Akkumas,cubbuun nuti xiqqoo jenne tufannu guyyaa tokko walitti kuufamte akka xaaraa manaa nuratti jigdi. Cubbuu xixiqoo irraa of qabuuf yoo hin carraaqin,cubbuu gurguddaa irraayis of qabuun garmalee nutti ulfaata. Cubbuuwwan/diliwwan xixiqoo irraa yoo of qabne gurguddaa irraayis of qabun nutti hin ulfaatu.

*Cubbuun tee rahmata Rabbii irraa abdii akka si hin kuchisiisne fi baay’atun hojii gaggaari kee of ajaa’ibsiifachuun rahmata Rabbii keessaa akka si hin baasne of eeggadhu. “Yaa Rabbii cubbuun teenya nu balleessu fi hojii gaggaarii keenyan of tuulu irraa nu tiksi.” jedhi kadhu.*

**7.Boqonnaa qabaadhu,karaa madaalama hordofii-** daandii jijjiramaa dheeraa kana irra deemte iddo

gahumsaa kee gahuuf gaaddisa jala teette hafuura baafachuu si barbaachisa. Guyyaa tokkon utaalen achii gahaan kufuudha. Guyyaa tokkoon amala kiyyaa hundaa jijjiroon qaba,beekaa ta'uun qaba jette yoo kaate ni kufta. Kanaafu suutaa fi daandii madaalamaa hordofuu si barbaachisa.

“Yommuu Rabbiin wayiti nama ajaju sheyxanni karaa lamaan nama gowwoomsa. Yookaa namticha laamshoo(dadhabaa) taasisu fi hojii gaggaari akka hin hojjanne godhu yookiin immoo dhaadhessuu fi daangaa akka darbu gochuun sheyxanni nama gowwomsa. Dhugumatti amantiin Rabbii nama dadhabaa fi daangaa darbu jiddutti madaallamaadha akkuma sulula gaarren lamaan jiddu. Namni ajaja Rabbii irraa laafe fi duubatti harkifate,ajaja san qisaasse jira. Namni daangaa darbees ajaja san qisaasse ykn balleesse jira. Kan jalqabaa minimam limitii(daangaa xiqqaa) guutu dhiisu isaatin. Kan lammataa immoo maksimum limiti(daangaa ol'aanaa) darbuu isaatin ajaja qisaasesse/balleesse.”Imaam Ibn Al-Qayyim(Rabbii rahmata isaa haa godhu)

Keeyata armaan olii yoo ibsinuu sheeyxaanni fedhii waa hojjachuu nama keessatti ajeessun namtichi ajaja Rabbii akka hin hordofne fi itti hin bulle godha. Karaa biraatin immoo fedhii garmalee nama keessatti bobeessun daangaa Rabbiin kaa'ee akka darbu godha. Islaamni kanniin lamaan irraa adda ta'uun daandii madaalamaa fi qajeeladha.

Kanaafu daandii qajeela kanarra yoo adeemnu osoo garmalee ofitti hin jabeessinee fi dhumarraati hifanne akka hin dhiisne boqonnaa nu barbaachisa. Karaa madaalama Nabiyyana Muhammad(SAW) fi sahaboonti isaa irra deemanirra deemutu fiiye milkaa'inna irra nu ijjadiisa.

Karaa biraatin immoo laamshoo taane Islaama hordofuu irraa duubatti jechuu hin qabnu. Utubaa Islaama kan ta'e salaata,takka salaata takka dhiisaa akkamitti addunyaa aakiratti milkoofnaa?

### **Yaadannoo Dhumaa**

Daandiin jijjiramaa daandii dheeradha. Carraaqqi dhugaa,fedhii keessaa burqu,Rabbitii hirkachuu, du'aayi fi sabrii gochuu barbaachisa. Daandii kanarraa yoo adeemnu galaa beekumsaa gudunfachuu qabna. Wantoota daandii kanarraa nu dabsan beekuf beekumsi(ilmiin) murteessadha.Of jijjiroon yeroo hundaa beekumsa nu barbaachisa. Of jijjiroon adeemsaa suuta suutati malee wanta sakandii takkatti raawwatamu miti. Nama Rabbiin sodaatu fi gaarummaa qabu ta'uuf hanqinna fi cubbuu keenya qorachuun guyyaa guyyaan sirreessuf carraaqudha. Fakkeenyaf torpii yookiin ji'a yookiin waggaan kana keessa amala of tuulu yookin amala badaa kiyya tokko nan sirreessa jenne yaadun ergasii sirreessuf carraaqudha. Daandiin jijjiramaa uffata amala gadhee fi wallaalummaa ofirraa baasanii uffata taqwaa,beekumsaa fi gaarummaa ofitti diirudha. Uffata kana jijjirachuu suuta suutan,malaan,sabriin,beekumsaan adeemu qabna. Yooakkana goone fedhii Rabbiit kaayyoo guddaa keenya gahuu ni dandeenyaa. Daandii jijjiramaa asumarratti xumuramee jira. InshaAllah hanga barruu biraatin walitti deebinutti Assalamu aleykum warahmatullahi wa barakaatuh

Alhamdulillah gargaarsa Rabbiit hojii keyrii hojjanna. Yaa Rabbii Ati nu milkeesse.

Yaada keessaniif: sammubani@hotmail.com

#### **Date Created**

November 6, 2015

#### **Author**

---

admin